



Skólareglur Ártúnsskóla

Skólareglur:

Skólinn er vinnustaður nemenda. Þeir eru þar til þess að taka þátt í skólastarfi og auka þekkingu sína og víðsýni. Þeir þroska með sér þá eiginleika að fylgja fyrirmælum, bera virðingu fyrir öðrum, efla sjálfsaga og sjálfsvirðingu. Nemendur sýni í daglegu viðmóti umburðarlyndi, tillitssemi og jákvæða afstöðu til skólafélaga og skólastarfs.

Við nemendur í Ártúnsskóla:

- *mætum stundvíslega í skólann og virðum skipulag skólastarfs.*
- *sýnum ávallt kurteisi og hlýðum starfsfólki skólans.*
- *leggjum okkur fram og vinnum verk okkar vel.*
- *göngum vel um skólann og umhverfi hans.*
- *sýnum tillitssemi og umburðarlyndi í garð hvers annars.*
- *höfnum ofbeldi og einelti.*

Komdu fram við aðra eins og þú vilt að komið sé fram við þig.

Almennar reglur

Stundvísi - mætingar

Nemendur skulu vera stundvísir. Þeir sem mæta of seint biðjast afsökunar og gæta þess að engin truflun hljótist af. Foreldrar tilkynni um forföll nemenda áður en skóladagur hefst. Nemandi sem vegna veikinda þarf að vera inni í frímínútum skal koma með skriflega ósk undirritaða af foreldri.

Óheimil fjarvist nemenda er óásættanleg og á ábyrgð foreldra. Allar óskir um leyfi fyrir nemendur berist umsjónarkennara. Sé óskað eftir lengra leyfi en tveir dagar verður



leyfisbeiðnin að berast umsjónarkennara á þar til gerðu eyðublaði sem finna má á heimasíðu skólans. Undanþága frá skólasókn er á ábyrgð foreldra og háð mati skólastjórnenda í samráði við Skóla- og frístundasvið Reykjavíkurborgar.

Skólasókn

Eftir 10 seinkomur hefur umsjónarkennari samband við forráðamenn viðkomandi nemanda og gerir honum/þeim grein fyrir stöðu mála.

Eftir 15 seinkomur eru forráðamenn boðaðir á fund með aðstoðarskólastjóra og umsjónarkennara þar sem farið er yfir skólasókn og mögulegar leiðir til úrbóta.

Takist ekki að finna lausn á skólasókn nemandans og seinkomur halda áfram að hámarki 18 skiptum verður mál hans sent í nemendaverndarráð Ártúnsskóla

Frímínútur - skólalóð

Nemendur mega ekki yfirgefa skólalóð nema að fengnu leyfi umsjónarkennara eða starfsfólks sem er á útivakt. Hætta skal leikjum um leið og skólabjallan hringir og fara í raðir við anddyri. Samskipti nemenda í frímínútum skulu einkennast af félagsanda, tillitssemi og virðingu fyrir skólafélögum og starfsfólki skólans.

Nesti

Gætum þess að neyta hollrar fæðu í skólanum og komum með hollt og gott nesti. Í skólanum er ekki heimilt að vera með sælgæti (s.s. tyggigúmmí og gosdrykki).

Verðmæti

Við notum ekki farsíma á skólatíma. Leikjatölvur og tónhlöður er ekki leyfilegt að vera með í skólanum. Skólinn tekur enga ábyrgð á slíkum tækjum. Ekki er tekin ábyrgð á verðmætum (s.s. peningum, úrum og skartgripum) eða öðrum lausamunum sem nemendur kunna að taka með sér í skólann.

Bækur, námsgögn, heimanám o.fl.

Nemendur taki viðeigandi bækur og námsgögn með sér heim og tryggi þar með að allt sé við höndina sem nota þarf til undirbúnings næsta skóladags. Því er beint til foreldra að þeir fylgist reglulega með heimanámi barna sinna.



**Góð meðferð skólabóka lengir líftíma þeirra.
Krass og krot í bækur er engum til sóma.**

Umhverfisátak

Ártúnsskóli er skóli á grænni grein. Því fylgir sú ábyrgð að nemendur og starfsfólk séu meðvitaðir um verðmæti og nýti vel allt efni t.d mat, pappír, rafmagn og vatn.

Fatnaður

Nemendur komi snyrtilega til fara í skólann og búnir eftir veðri til að geta notið útivistar í frímínútum. Í Ártúnsskóla notum við skólapeysur, mælst er til þess að nemendur mæti í skólapeysunum sínum í skólann. Nemendur hugsi vel um eigin fatnað og skilji hann ekki eftir. Mikil verðmæti liggja í fatnaði og merktur fatnaður kemst til skila og glatast síður. Týnist fatnaður eða skemmist (skófatnaður meðtalinn) er það ekki bótaskyld nema rakið verði til vanrækslu starfsfólks skólans.

Hjólreiðar

Nemendur sem koma á reiðhjólum þurfa að hafa hjálm á höfði, hafa hjólin læst á skólalóðinni og ekki hreyfa þau fyrr en að skóladegi lýkur. Af öryggisástæðum er þess óskað að börnin komi ekki á reiðhjólum í skólann yfir veturinn.

Ekki er hægt að geyma hjól, hlaupahjól og hjólabretti inni í skólanum og verða nemendur því að geyma þau utandyra. Skólinn ber ekki ábyrgð á reiðhjólum, hlaupahjólum og hjólbrettum sem nemendur koma á í skólann. Öll mál sem tengjast skemmdum verða foreldrar að gera upp sín í milli.

Skemmdir

Vinni nemendur skemmdir á skólanum eða eignum hans bæti þeir skaðann í samráði við foreldra sína.